

Na osnovu člana 13. Zakona o principima lokalne samouprave u Federaciji BiH ("Službene novine FBiH", br. 49/06 i 51/09), čl. 10. i 68. Statuta Općine Centar ("Službene novine Kantona Sarajevo", br. 23/04 Prečišćeni tekst), a u vezi sa tačkom 5. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 37/24), Općinsko vijeće Centar je, na 17.redovnoj sjednici održanoj dana 28.04.2026. godine, donijelo

## **PRAVILNIK O USLOVIMA, NAČINU I KRITERIJIMA ZA DODJELU SREDSTAVA VJERSKIM ZAJEDNICAMA**

### **Član 1. (Predmet Pravilnika)**

Ovim Pravilnikom utvrđuju se uslovi, način i kriteriji za dodjelu finansijskih sredstava vjerskim zajednicama iz Budžeta Općine Centar Sarajevo.

### **Član 2. (Uslovi za ostvarivanje prava)**

- (1) Sredstva iz člana 1. ovog Pravilnika dodjeljuju se vjerskim zajednicama koje imaju sjedište ili izgrađene vjerske objekte na području općine Centar.
- (2) Izuzetno od odredbi iz stava (1) ovog člana sredstva se mogu dodijeliti i vjerskim zajednicama koje nisu na području općine Centar, ali su od značaja za redovno obavljanje vjerskih obreda lokalnog stanovništva.

### **Član 3. (Način ostvarivanja prava)**

- (1) Sredstva iz člana 1. ovog Pravilnika dodjeljuju se putem Javnog poziva koji raspisuje Općinski načelnik putem Službe za obrazovanje, društvene djelatnosti, kulturu i sport (u daljem tekstu: Služba), a koji se objavljuje na službenoj web stranici Općine Centar Sarajevo i ostaje otvoren do 30. septembra tekuće budžetske godine, odnosno do utroška sredstava za ovu namjenu.
- (2) Javni poziv obavezno sadrži:
  - a) predmet,
  - b) visinu sredstva koju jedan korisnik može ostvariti,
  - c) potrebnu dokumentaciju,
  - d) način prijave na javni poziv,
  - e) način odabira korisnika,
  - f) obavještanje prijavljenih korisnika.
- (3) Prijava na Javni poziv obavezno se podnosi putem protokola Općine Centar, u pisanoj formi na propisanom obrascu, a koji je sastavni dio Javnog poziva.
- (4) Jedan podnosilac prijave može podnijeti više prijava u toku Javnog poziva, pri čemu nadležni organ zadržava diskreciono pravo da odobri finansiranje/sufinansiranje za samo jedan projekat po aplikantu.
- (5) Pristigle prijave iz stava (3) ovog člana razmatra nadležna općinska služba.

- (6) Prijave će se rješavati po redosljedu podnošenja. Služba će u roku od 30 (trideset) dana od dana prijema zahtjeva utvrditi da li su ispunjeni uslovi za dodjelu sredstava, te obavijestiti podnosioca zahtjeva.
- (7) Služba će uz prethodno pribavljeno mišljenje Komisije za odnose sa vjerskim zajednicama Općinskom načelniku dostaviti na razmatranje prijedlog odluke za finansiranje.
- (8) Konačnu odluku o dodjeli i visini sredstava za podršku vjerskim zajednicama donosi Općinski načelnik.
- (9) Općinski načelnik će na osnovu odluke iz stava (8) ovog člana sa vjerskim zajednicama zaključiti Ugovor o finansiranju/sufinansiranju projektnih i drugih aktivnosti.
- (10) Na osnovu Ugovora, nadležna služba za finansije vrši isplatu sredstva.

#### **Član 4. (Pravo prigovora)**

- (1) Svaki podnosilac zahtjeva može podnijeti prigovor Komisiji za razmatranje prigovora (u daljem tekstu: Komisija) u roku od 8 (osam) dana od dana prijema obavijesti/odluke.
- (2) Komisiju imenuje Općinski načelnik iz reda uposlenika.
- (3) Odluku o prigovoru, Komisija će donijeti u istom roku, računajući od dana njegovog podnošenja.

#### **Član 5. (Kriteriji za dodjelu sredstava)**

- (1) Sredstva iz člana 1. ovog Pravilnika raspodjeljuju se vjerskim zajednicama za projektne i druge aktivnosti, i to:
  1. Institucijama IZ u BiH – Medžlis IZ Sarajevo i dr. – 50 % od ukupno planiranih budžetskih sredstava za vjerske zajednice;
  2. Institucijama Katoličke crkve u BiH – Vrhbosanska nadbiskupija i dr. – 25 % od ukupno planiranih budžetskih sredstava za vjerske zajednice;
  3. Institucijama SPC u BiH - Mitropolija Dabrobosanska i dr. – 15% od ukupno planiranih budžetskih sredstava za vjerske zajednice;
  4. Institucijama Jevrejske zajednice BiH – Jevrejska općina Sarajevo – 10% od ukupno planiranih budžetskih sredstava za vjerske zajednice.
- (2) Sredstva iz stava (1) ovog člana dodjeljuju se za:
  - a) građevinsko – zanatske radove, sanaciju, ili rekonstrukciju postojećeg vjerskog objekta ili dijela objekta, kao i izgradnju – dogradnju novog objekta ili dijela objekta;
  - b) organizaciju vjerskih praznika, blagdana, manifestacija, vjersko – kulturnih i prosvjetnih događaja, tribina, okruglih stolova, te raznih oblika i vidova prezentiranja stvaralaštva vjerske zajednice, kao i štamparsko – izdavačke, prevodilačke i druge aktivnosti.
- (3) Prednost za dodjelu sredstava kapitalnog granta imaju vjerski objekti sa područja općine Centar Sarajevo, te oronuli, dotrajali objekti koji imaju status kulturno-historijskog nasljeđa ili su pod zaštitom države, kao i objekti čije stanje ugrožava sigurnost imovine i lica.

- (4) U slučaju da po okončanju Javnog poziva ostanu neutrošena sredstva, ista će se preraspodijeliti drugim vjerskim zajednicama, u skladu sa pristiglim zahtjevima, po redosljedu podnošenja i uz prethodno pribavljeno mišljenje Komisije za odnose sa vjerskim zajednicama.

#### **Član 6. (Eliminatorni kriteriji)**

- (1) Služba neće razmatrati zahtjeve za dodjelu novčanih sredstava onim vjerskim zajednicama koje nisu u skladu sa Odlukom o izvršenju budžeta Općine Centar Sarajevo dostavile izvještaj o utrošku novčanih sredstava za prethodne godine.
- (2) Služba neće razmatrati zahtjeve pojedinačnih vjerskih objekata za dodjelu novčanih sredstava iz kapitalnog i tekućeg granta, koji nemaju status pravne osobe u skladu sa Zakonom o slobodi vjere i pravnom položaju crkava i vjerskih zajednica u BiH („Službeni glasnik BiH“, broj 5/04).
- (3) Služba neće razmatrati zahtjeve čija vrijednost prelazi iznos ukupno planiranih sredstava u Budžetu za ove namjene bez dokaza o obezbjeđenju dodatnih sredstava od strane drugih donatora.

#### **Član 7. (Potrebna dokumentacija)**

- (1) Podnosioci zahtjeva na Javni poziv trebaju dostaviti sljedeće:
  - a) Zahtjev za dodjelu sredstava:
    - za dodjelu novčanih sredstava iz kapitalnog granta zahtjev treba biti detaljno obrazložen, sa preciznim informacijama o projektu, sa predmjerom i predračunom radova, planiranim aktivnostima, namjeni sredstava (sanacija, rekonstrukcija, druga namjena),
    - za dodjelu novčanih sredstava iz tekućeg granta, vjerske zajednice su dužne dostaviti projekat sa kojim apliciraju za novčanu podršku, odnosno navesti naziv projekta, cilj, aktivnosti, planirano vrijeme realizacije, očekivani broj učesnika, mjesto realizacije, budžet planiranih aktivnosti sa jasno definisanim budžetskim stavkama i pojedinačnim iznosima;
  - b) Potrebne dozvole i saglasnosti (urbanističke, građevinske, saglasnosti Komisije za očuvanje nacionalnih spomenika i sl.) ukoliko se radi o radovima koji podrazumijevaju ovakvu vrstu dokumentacije;
  - c) Aktuelni izvod iz registra nadležnog organa u kojem je registrovan podnosilac prijave;
  - d) Bankovna instrukcija za plaćanje (potvrda o broju tekućeg računa) koja može biti starija od 6 mjeseci;
  - e) Dokaz o obezbjeđenju dodatnih sredstava od strane drugih donatora, za zahtjeve čija vrijednost prelazi iznos ukupno planiranih sredstava.
- (2) Ispunjavanje uslova iz člana 6. stav (1) ovog Pravilnika biće provjereno službenim putem.
- (3) Dokumentacija se podnosi u originalu ili ovjerenj kopiji ne starijoj od 6 mjeseci.

- (4) Izuzetno od prethodnog stava, prihvatljiva je dokumentacija iz stava (1) tačka b) ovog člana starija od šest mjeseci, pod uslovom da nije istekla njena važnost u trenutku podnošenja prijave.

### **Član 8. (Praćenje i izvještavanje)**

- (1) Korisnici sredstava su dužni u roku od 30 dana od okončanja aktivnosti, odnosno utroška sredstava dostaviti narativni i finansijski izvještaj o utrošku dodijeljenih sredstava, sa pratećom finansijskom dokumentacijom, kojom jasno dokazuju da je program/projekat realizovan.
- (2) Za sredstva koja nisu utrošena ili su djelimično utrošena u budžetskoj godini, korisnici sredstava su dužni dostaviti izvještaj u skladu sa Odlukom o izvršavanju Budžeta Općine Centar Sarajevo.
- (3) Prihvataju se troškovi koji su nastali u periodu od 01.01. do 31.12. u godini u kojoj je Javni poziv objavljen.
- (4) Korisnik sredstava koji u utvrđenom roku ne opravda dodijeljena sredstva, obavezan je ista vratiti i nema pravo ponovnog apliciranja na Javni poziv po istom osnovu naredne godine.
- (5) U toku perioda korištenja dodijeljenih sredstava, Općina zadržava pravo vršenja kontrole utroška finansijskih sredstava. U slučaju osnovane sumnje za nezakonito ili nenamjensko trošenje Ugovorom dodijeljenih sredstava, Općina zadržava pravo da pokrene proceduru povrata sredstava.
- (6) U toku realizacije programa/projekta, korisnici sredstava, u slučaju bilo koje promjene okolnosti za realizaciju programa/projekta ili promjene adrese, broja telefona, mail-a ili promjene kontakta, ovlaštene osobe ili broja računa kod banke, dužni su obavijestiti u pisanoj formi Općinu, koji se neće smatrati odgovornim u slučaju da ne uspije kontaktirati podnosioca prijave.
- (7) Izvještaje vjerskih zajednica obrađuje i prati nadležna općinska služba.
- (8) Služba je dužna redovno izvještavati Komisiju za odnose sa vjerskim zajednicama o pristiglim izvještajima, sadržaju i ispravnosti izvještaja.

### **Član 9. (Finansijska sredstva)**

Finansijska sredstva za realizaciju ovog Pravilnika utvrđuju se Budžetom Općine Centar za svaku kalendarsku godinu.


### **Član 10. (Prestanak važenja)**

Stupanjem na snagu ovog Pravilnika prestaje da važi Pravilnik o uslovima, načinu i kriterijima za dodjelu sredstava vjerskim zajednicama („Službene novine Kantona Sarajevo“, broj 14/25).

**Član 11.**  
**(Stupanje na snagu i objava)**

Pravilnik stupa na snagu narednog dana od dana objave na Oglasnoj ploči Općine Centar, a naknadno će se objaviti u „Službenim novinama Kantona Sarajevo“.

Broj:01-11-3207/26  
Datum: 28.04.2026.godine



PREDSEDavajući OPĆINSKOG VIJEĆA

Benjamin Iović

Ovaj Pravilnik je objavljen na oglasnoj  
ploči Općine Centar Sarajevo dana

